

इवनिंग डोगरी न्यूज़ बुलेटिन

समे .18:15 Hrs

Headlines

- जम्मे ते एहदे आले-दोआले दे कई सारे हिस्सें च भारी बरखा, केई सारे दरेयाएं दा पानी खतरे दे निशान तोड़ी पुज्जा।
- मुखमंत्रि उमर अब्दुल्ला होंरे दिल्ली दी मुखमंत्रि रेखा गुप्ता होंरेगी जम्मू-कश्मीर हाई कन्ने होए दे नुकसान लेई मदद दी पेशकश आस्ते आभार प्रगट कीता।
- जल शक्ति मंत्री जावेद अहमद राणा होंरे पुंछ च राहत ते बचास कम्म सने आपदा प्रबंधे दा जायजा लैता।
- पीडीडी नै जम्मू खिते च बिजली बहाली आहला कम्म कीता। एह कम्म रिकार्ड समे च पूरा कीता गेआ। 65 फीसदी पानी सप्लाई आहला कम्म बी पूरा होई गेआ ऐ।
- मौसम विभाग नै अगले 24 घंटे लेई जम्मू खिते च भारी बरखा ते हाई दे खतरे दी चेतावनी जारी कीती ऐ। जम्मू-श्रीनगर राश्ट्री जरनैली शिड़क लगातार बरखे करी गड़डिएं दी आओजाई लेई बंद ।

<><><><><><>

Heavy Rains

जम्मू ते आले-दोआले दे खेतरें च कल रातीं थमां इक्क बारी फी भारी बरखा नै आम जन-जीवन गी प्रभावित कीता ऐ। लगातार बरखा करी सुरक्षा ते आओजाई दे बारै च नमियां चिंता पैदा होई गेइयां न। पहाईं होआ'रदी बड़ी मती बरखा करी तवी नदी दा जलस्तर बी बधी गया ऐ। प्रशासन

नै लोकें गी तवी दे कंडे नेई जाने दी सलाह दिती ऐ। रियासी जिले दे कटरा ते त्रिकुटा पहाड़ियें च बड़ी मती बरखा होई जेदे चलदे प्रशासन नै बसनीकें गी साबधानी बरतने आस्तै सलाह जारी कीती ऐ। चनाह दरेया दे बददे जल स्तर गी दिखदे होई सलाल डैम दे दरवाजे खोली दिते गे न। पस्सियां पौने ते वैशणो माता जातरा मार्ग दी बहाली दे जत्नें करी जातरा लगातार 8में दिन बी बंद रेई। इस बारै होर जानकारी कन्नै स्हाड़े जिला संवाददाता देवेन्द्र ठाकुर।

तोआई, जिला साम्बा च बसंतर ते आले-दोआले दे दरेयाएं-नालें च पानी दे बददे स्तर कन्नै हाईं दी शंका पैदा होई गई ऐ।

<><><><><><><><>

Delhi-CM Call

मुख्यमंत्री उमर अब्दुल्ला होरें जम्मू-कश्मीर च हाईं दे संकट दे बिच्च इक्कजुटता ते समर्थन जाहिर करने आस्तै दिल्ली दी मुख्यमंत्री रेखा गुप्ता हुंदा आभार प्रगट कीता ऐ। उमर अब्दुल्ला होरें दिल्ली सरकार आसेआ जम्मू-कश्मीर लेई मदद दी पेशकश दी सराहना करदे होई इसी इस चुनौतीपूर्ण समें च इक खुशी दा इशारा दस्सेआ। उनें आखेआ जे सद्भावना ते सहयोग दे इस चाल्ली दे कम्म ना शड़ा नैतिक शक्ति प्रदान करदे न, बल्के माड़े हालतें पर काबू पाने आस्तै सामूहिक संकल्प गी बी मजबूत करदे न। मुख्यमंत्री होरें केंद्र शासित प्रदेश दे हाइ प्रभावित लोकें आस्तै तौले गै राहत तु पुर्नवास यकीनी बनाने दी अपनी बचनबद्धता गी फी पक्का कीता ऐ।

<><><><><><><><>

Rana-Poonch

जल शक्ति मंत्री जावेद अहमद राणा होरें हाल च आए दे हाईं दे बाद अज्ज पुंछ जिला प्रशासन कन्नै जरूरी सेवाएं, राहत प्रयासें, बहाली दे कम्में ते आपदा तैयारिएं दी समीक्षा बैठक दी

अध्यक्षता कीती। उनें प्रभावित परौआरें गी तौले मुआवजे ते जरूरी सेवाएं दी तौले बहाली दी फौरी लोड़ पर जोर पाया। मंत्री होरें मौसम दे हालात दे मददेनजर विद्यार्थिं दे सुरक्षा गी सुनिश्चित करने आस्तै स्कूलें दा विस्तृत सुरक्षा आडिट करने दे महत्व पर बी जोर दिता। उनें अधिकारिं गी राहत दी बण्ड च तेजी आहने ते चला'रदे पुनर्वास कम्मं दी बरीकी कन्ने निगरानी करने दे निर्देश बी दिते।

<><><><><><>

Debris-Removed

जम्मू-कश्मीर च हाल च गै चानचक्क हाड़ आने ते ल्हास-पस्सियां पौने परैंत जॉलोजी माइनिंग निदेशालय नै राई-बाई ते निजी जमीनें थमां गाद, लेतर ते मलबा फौरन हटाने दे निर्देश दिते न। जारी कीते गेदे इक सर्कुलर च आखेआ गेआ ऐ जे लेतर ते बजरी दे भण्डारें, राई-बाई आस्तै माफक जमीं गी राई-बाई दे जोग नेई रौहन दिता ऐ। जिला खनिज अधिकारिं गी इसी ढाहने दी निगरानी दी जिम्मेदारी सौंपी गई ऐ। मलबे गी इस चाल्ली कन्ने ढहाया जाना चाहिदा जेड़ा जमीनी सतहें गी नुकसान नेई पुजा। सर्कुलर च अग्गे आखेआ गेआ ऐ जे मैहकमे दे अधिकारी इस हुकमै दे कुसै बी उल्लंघना आस्तै जिम्मेवार होडन। उनेंगी इब्बी आखेआ गेआ ऐ जे ओह हाड़ प्रभावित खेतरें च रौहने आहले लोकें दी रोजी-रूट्टी दी फहाजत निश्चित करन।

<><><><><><>

Bridges-Army

जम्मू खिते च हाड़ कन्ने प्रभावित होई दिं शिड़कें ते पुलें गी बहाल करने दे जत्नें च तेजी आवा'रदी ऐ। फौज आसेआ नमां बनाया गेदा चौथा तवी पुल पर हून हल्की गड्डियें दी आओजाई शुरू होई गई ऐ जेदे कन्ने लोकें गी बड़ी राहत थहोई ऐ। विनाशकारी हाड़े करी मते सारे खेतर डुब्बी गए, घरें ते लाजमी बुनियादी ढांचे जियां के ठाठरी कोल एन.एच-244 गी तबाही दा सामना

करना पेआ ऐ। एह राजमार्ग प्रदेश दे बाकी हिस्सें गी डोडा ते किश्तवाड़ कन्ने जोड़दा ऐ। इस शिड़क गी बहाल करने आस्तै फौज डोडा च जंगलवार नाले पर इक वैली पुल दा निर्माण करा'रदी ऐ। चुनौतीपूर्ण मौसम ते इलाके दी मुश्कल भुगौलिक स्थिति दे बावजूद पुल बनाने च तेजिया कन्ने कम्म होआ करदा ऐ। एहदे च निर्माण च मकामी प्रशासन ते सुरक्षाबलें दा अहम योगदान थोआ करदा ऐ।

<><><><><><>

Power-Restoration

25 ते 26 अगस्त गी भारी बरखा ते चानचक्क आए दे हाड़ करी बिजली-पानी सरबन्धी ढांचे गी बड़ा मता नुकसान होआ हा। बिजली विकास विभाग नै समें पर बिजली दी सप्लाई खिते च बहाल कीती ऐ। इनें बरखें ते हाड़ें करी बड़ा मता नुकसान होआ। मैहकमे नै ढांचे गी बड़ी तेजिया कन्ने परतिए बहाल कीता ऐ। तवी नदी, मुकामी नालें दे बड़े मते बहाव करी ट्रांसमिशन ते बंड सरबन्धी ढांचे गी नुकसान पुज्जा। पीडीडी नै पुर्नबहाली आहले कम्मै गी व्यापक तौर पर पूरा कीता। मैहकमे नै कुदरती आपदा दे बावजूद जरूरी सेवाएं गी समेंसिर बहाल करने प्रति अपनी बचनबद्धता गी दोहराया ऐ।

<><><><><><>

Water-Supply

तोआई, हाल च आए दे हाड़ें ते भारी बरखा करी मते नुकसान परेंत जम्मू दी तकरीबन 65 फीसदी पानी दी सप्लाई बहाल करी दिती गई ऐ। जम्मू नगर-निगम नै दस्सेआ ऐ जे शीतली लोहार ते छल च जरूरी फिल्ट्रेशन प्लांट द'ऊं दिनें दे अंदर-अंदर चालू होने दी मेद ऐ जिसलै के शीतली मांडा गी पूरी चाल्ली बहाल होने च त्रै दिन लग्गी सकदे न। धोंथली फिल्ट्रेशन प्लांट च बी

बहाली दा कम्म प्रगति पर ऐ ते मेद ऐ जे एह बी तौले गै चालू होई जाग। दुर्गानगर आहला प्लांट दे कल्लै तोड़ी चालू होने दे असार न। हुनै तगर 126 ट्यूबवैलें बिच्चा 110 गी बहाल करी दिता गेआ ऐ जेदे कन्नै पानी दी सप्लाई गी पूरी चाल्ली परतियै शुरू करने दी मेदां बधी गेइयां न। आकाशवाणी समाचार कन्नै गल्ल करदे होई जम्मू नगर निगम दे कमिशनर देवांश यादव होरे आखेआ।

<><><><><><>

Weather

मौसम विभाग नै अगले 24 घंटे दरान जम्मू ते कश्मीर दे कई सारे जिलें च भारी थमां बड़ी भारी बरखा पौने दी पेशकश कीती ऐ। विभाग नै सौहगा कीता ऐ जे इस करी कई सारी थाहरें पर बद्दल फट्टने, चानचक्क हाड़ औने, मलबा औने ते कुप्पड़ बी पेई सकदे न। डोडा, कठुआ, किश्तवाड़, कुलगाम, पुंछ, रामबन, रियासी ते उधमपुर जिलें मते प्रभावित रेई सकदे न। प्रशासन नै लोकें गी इस अवधि दरान मता सौहगा ते सतर्क रौहने लेई आखेआ ऐ। इस बारै होर जानकारी दिंदे होई मौसम विशेषज्ञ फारूक अहमद भट्टा होरें आखेआ।

स्कूली शिक्षा निदेशक नै खराब मोसम दे चलदे सारे सरकारी ते निजी स्कूलें गी कल बी बंद रखने दा हुक्म जारी कीता ऐ। जम्मू-कश्मीर बोर्ड ऑफ स्कूल एजुकेशन नै खराब मोसम दे मद्देनजर 10मीं ते 11मीं जमात दे म्तेयान जेड़े कल होने हे, गी अगड़ा पाई दिता ऐ। इस बारै ताजा तरीक दी घोषणा बक्खरे तौर पर कीती जाग।

<><><><><><>

NHW-Closed

जम्मू-श्रीनगर राष्ट्रीय जलमैली शिडक पर भारी बरखें करी गड्डिएं दी आवाजाही पर असर पेआ ऐ। बनिहाल ते एहदे आले-दोआले दे इलाकें च अज्ज परतिए बरखा होआ'रदी ऐ जेदे करी हर मौसम च कश्मीर घाटी गी मुल्ख भरै कन्नै जोड़ने आहली शिडका परआवाजाई बाधित होई ऐ। आकाशवाणी जम्मू सांवाददाता दी रिपोर्ट मूजब गड्डिएं दी आवाजाई सुरक्षा कारणें करी बंद करी दिती गई ऐ। किश थाहरें पर ल्हास-पस्सियां पौने ते कुप्पड़ पौने दी खबर ऐ। इस कारण यात्रिएं दी सुरक्षा गी ध्यानै च रखदे होई एह गेंस पुट्टी गई ऐ। ट्रैफिक पुलस दा आखना ऐ जे जरनैली शिडक जेड़ी 6 दिनें मगरा कल गड्डियें दी आवाजाई लेई आंशिक तौर पर बहाल होई ही, अज्ज परतिए बंद करी दिती गई ऐ। ट्रैफिक विभाग नै यात्रिएं गी सलाह दिती ऐ जे ओह शिडक दी स्थिति दा पता लाने मगरा गै यात्रा शुरू करन।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रेजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14

September 2025 संग्रा 6 बजे कोला पैहले- पैहले आइए दस्ती जमा करोआनी होग। इस बारे
व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>